

دار النيل والفرات للنشر والتوزيع



ياسر عيد

حلم في تابوت

أشعار عامة

الطبعة الأولى 2017

بطاقة الكتاب

عنوان المؤلف : حلم في تابوت
المؤلف : ياسر عيد
التصنيف : أشعار
رقم الإيداع : 26173 - 2017
عدد الصفحات : 132
رقم الإصدار الداخلي : 90
تاريخ الإصدار الداخلي : 2017 - 12

جميع حقوق الطبع والنشر محفوظة للشاعر، ولا يحق لأى دار نشر
طبع ونشر وتوزيع الكتاب الا بموافقة كتابية وموثقة من الشاعر

دار النيل والفرات للنشر والتوزيع

سجل تجارى : 58365
بطاقة ضريبية : 165-5-00031-572-01-35
رقم التسجيل : 2017-7 544-662-202
E-mail: alnile waalforat@yahoo.com
twitter: النيل والفرات
youtube: alnile waalforat@yahoo.com
facebook: alnile wa alforat
هاتف : 01011256943 - 01116202218 - 01202541192



الشرقية - العاشر من رمضان - مجاورة ١٣ - عقار ٣٠٤ - الدور الثاني - أمام سنتر ١٣

شكر وتقدير

أتقدم بخالص الشكر والتقدير لكل من وقف بجانبى وقدم لى يد العون والمساعده فى تحقيق حلمى وخط إسمى بين عمالقة الأدب والشعر تلميذ يحبوا على نهجهم إلى أساتذتى وإخواتى وأصدقائى من كانوا سببا فى دفعى للأمام

الشاعر / ناجى عبدالمنعم - الشاعر / محمد الساعى -
الشاعر / محمد المخزنجي الشاعر / عبدالعظيم سمير -
الشاعر / عمرو المصرى - الشاعر / محمد البياع - الشاعر /
أحمد رجب النمر - سيادة المستشار أ / أحمد شعبان رجب /
الشاعر / وليد مليجى - الشاعر / عاطف حمدان - الفنانة /
أسماء رفيق (هاله) - الشاعره / سما محمد (سمسمة)
وكل الشكر والتقدير لمن تحملت الكثير معى فى الحياه ومن
أجل تحقيق حلمى رفيقة عمرى زوجتى الحبيبـه

ياسر عيد

إهداء

أهدى باكورة أعمالي إلى والدي ووالدتي من هم
سبب وجودي بالحياه إلى زوجتي وإبنتي (منة
الله) وإلى أخواتي وكل أقاربي وأهل بلدتي
وقصيدة أعز الناس إلى روح إبنة عمتي رحمة
الله عليها وإلى كل أحبائي وأصدقائي وإلى كل
من قرأ حرف من حروفى المتواضعه

ياسر عيد

رصاصه غدر

إرسم علم .. بالدم مرفوع ع الميدان
يشهد علينا فرقك .. يوم وقفك
واقف تنادى الحق يرجع م الجبان
جاتك رصاصه غدر خاينه تسكتك
بس لسه . صوتنا صاحى ماماتش فينا
حق الشهيد مهما غاب أهو دين علينا
لسه بكره الفجر جى وبيناديننا
وباوعدك عشان بلدنا مكملين فى سكتك
وانتى يا أمى اقلعى توب السواد
ابنك شهيد مش راح نقيم عليه حداد
كل مصرى يا أمى عايش فى البلد دى
هو ابنك مد ايده جى يمسح دمعك
أخويه لابس لبس جندى ع الحدود

سهرانه عينه حامى ضهرى من اليهود
واقف وصاحى للعدو وقفة أسود
ملعون أبوك ياللى قتلته بسحتك
كان ذنبه إيه يا مله كافره بربنا
ماشيين تتاجروا بدين إلها وسطنا
دا انتوا كفرتوا بشرع كل الأنبيا
إلحق وتوب قبل اللقا من غفلتك
حرقت ليه قلوب كتيره ع الولاد
كان نفسهم يرجعهم بعد البعاد
ازاى يطاوعك قلبك وايدك ع الزناد
تحرق قلوب أسره راعيها بقسوتك
ضوء البارود نور طريقه للنعيم
وسافك انت بكل جهلك للجحيم
هو مائسه ف غربته شوف كام شهيد
وانت جايلك الوعيد والنار هتاكل جتتك رصاصة غدر

حَاسِّكَ وَإِنْتَ حَسَّانِي

ما بين اللحظة والتانيه
عيونى ليك مشتاقه
حتى الرَّمشه من رمشى
كارهما لما تتلاقى
بتحرم عيني من شوفك
ياساكنه قلبى والننى
غزلت حروفي بحروفك
أمل ناسجينه متحنى
ياذكرى لبكره يا حاضر
الموت وياكى يحيينى
ياليل عاشقه وأنا ساهر
ياتور دربى على جبينى

بحبك وانت عارفانى
ياورده عبيرها ما يروحش
حاسك وانت حسانى
وقلبي عليك ما كدبش
كفايا تقولى وتعيدى
سيبيننا نعيش لأحلامنا
وشوق ايدك على ايدى
يسهل صعب أيامنا
ما أنا الطايف فى محرابك
عملت الفرض والسنة
عشان أوصل لأعتابك
وأنول رضاك والجنة
غسلت ذنوبى من عشقى
لما اهتديت بأنوارك
غَيَّرت ف لوني وف رَسَمِي

حَبَّكَ قَلْبِي وَإِخْتَارَكَ
قَطَفْتُ الْوَرْدَ وَرَامِيَّتَهُ
لَمَّا نَزَلْتُ بِسْتَانِكَ
عَدَيْتُ الشُّوكَ مَا حَسِيَّتَهُ
عَشَانَ أَوْصَلَ لِأَغْصَانِكَ
لَاقَيْتُ شَوْقَكَ بِيَرْوِينِي
بَطْهَرَ حَنِينِكَ الصَّافِي
وَجْوهَ عَنِيكَ مَرْسُومَهُ
حَبِيبَتِي كُلَّ أَوْصَافِي
فَ مَا تَظْنِيشَ وَلَوْ لَحْظَهُ
بِ إِنْ فَ لَحْظَهُ رَاحَ أُسَيِّبُكَ
بَاعِيشَ فِيكَ الْأَمَلَ بَكَرَهُ
وَمَهْمَا بَعْدَتْ رَاحَ أَجِيلِكَ
أَدُونِ حَرْفِي فِي كِتَابِكَ
يَاوَرَدُهُ عَبِيرَهَا فِي كِتَابِي

دا أحلامى وأحلامك
راسمين العمر قدامى
حاسّك وإنّ حسانى

ضم إيدك ويَّا إيدي

ضم ايدك ويَّا ايدي

قوم نحقق مستحيل

البلد محتاجه لينا

لاجل مانكون الدليل

لسه قدامنا الكثير

لسه مشوارنا طويل

بالإرادة واتحادنا

نحقق الحلم الجميل

ضم ايدك ويا ايدي

الكل هاساعه المكان

المحبه اللي ما بيننا

بتهدي روحنا للأمان
قلبنا على قلب بعض
قلب واحد / مش جبان
نخلق الفرحة بايدنا
هديه لمنشيه سلطان
ضم إيدك ويا إيدى
واتحادنا يكون فى خير
ننسى أى خلاف ما بينا
نصحى جوانا الضمير
واللى يعمل خير نساعده
وف طريقه معاه نسير
لو عد المنشيه هاحكى
هحكى عنها كلام كتير
ضم إيدك ويا إيدى
خلى كتفى جنب كتفك

والطريق الى أمشى فيه

يبقى صفى نفس صفك

وان حلمت ف مره حلم

يبقى حلمى نفس حلمك

يدنا مع بعض واحده

صافی قلبی و صافی قلبک

ضم ايدك ويا ايدي

وبقلوب ملیانه حب

نبني امجادنا بايدينا

بكل بنت وكل شاب

الطريق صعب ولكنه

مش هانقبل اي صعب

راح نكمل طول ما احنا

بالقلوب بنقول يا ارب

ضم ايدك ويّا ايدي

الكلام على مين ؟

لو فضلت العمر أكتب
لو مليت الكون كتابه
مش راح أقدر مرة أوفي
لو في ذوقك والطياية
مستحيل أبدا يكفي
ذرة من حسنك خطابة
مش راح أنطق مرة إسمك
هاكتبك أنا بين سطوري
واللي عاشقك زي لازم
يحترم وصفي وشعوري
لو ف يوم أوصف جمالك
بلقى وصفك شئ يحير

يا عروسة النيل بحبك
قد روجي وعمري واكثر
فوق جبينك ألف شامة
صحن خدك فوق منور
كل يوم عن يوم ف قلبي
بلقى ليكي الشوق بيكبر
وابني ف قصورك واعلي
طوبة لولي وطوبة مرمر
نفسي كل الدنيا تعرف
حبي ليكي ياساكنه فيا
الحنان ف عينيكي طارح
ع الخدود ياسمين وقل
والقمر فوق نيلك أجمل
لما ييجي عليه يطل
لسه ما عرفتش حبييتي

اللي ساكنة سطوري مين
اللي عاشقاها حكاياتي
شرق غرب شمال يمين
هي ست الكون وأمي
واوعى تسأل هي مين
الكلام على مين ؟

ز علانه ليه ... ؟

ممکن أعرّف ز علانه ليه .. ؟

إيه يعنى حاسه إن بعدك عندي عادى

ودى فيها إيه .. ؟

ما انا قولت ياما بلاش بعاد وفضلت أدادى

بعدتى ليه .. ؟

سيبتى ليه البعد بينا يقسى قلبى

وذنبى إيه

لما أكون وسط لمة مش شايفها

والعقارب جوه ساعتى بتعاندى

لما كنت أستنى فيكى بالساعات

وأما أشوفك تعالى فيا بحور مشاعرى

وانتى عاشقه للسكات

جايه قال بتلوميني إن شوقي ليكى مات

كنتى فين .. ؟

عيدى تانى الذكريات لو كان دا ينفع

شوقى مين فينا كان للتانى يسمع

كل همه يشوف البسمه ع الشفايف

ما كانش فى يوم من بكره خايف

وانتى إيدك حاضنه إيده

كان طريقنا بين كفوفنا كأنه جنه

مش بإيدى بإيدك إنتى غصب عنى

وصلتينا لسكه ضلمه

كنت بامشى فى الطريق أتمنى أشوفك

كنت باعشق فيكى خوفك

لما بتشوقى صورتنا جوه عين اللى يشوفنا

واما كنتى تدارى عنى كمان كسوفك

لما باوصفك فى شوقى اللى كفى العاشقين

راح فين دا كله وليه بعدتي .. وكنتي فين ؟
فين كلامك لما قولتي إن بعدك عنى موت
وفرى شويه فدموعك الندم مش راح يفيد
م انتى كاتبه فى الروايه النهايه وبإيديكى
هى دى أنسب نهايه بجد ليكى
ياريت بجد عليا تانى ماتسألش
سيبيني أكمل فى الطريق بعدك واعيش
وماتزعلش
ليه زعلانه ... ؟

تُهت مني

لما باقعد ويا نفسي
واحكي يعني جوه مني
بلقى كل العيشة صعبة
وقلبي يهرب غصب عني
واتخطف في دقيقة وارجع
مرة ثانية واشوفني عيل
جوه ضلمة بطن أمي
وحضنها المليان حنان
أغزل الاحلام بصوتها
لحن طارح بالأمان
أعزفه وحدي واغني
ده ببساطة لأن يومها

ماكنش لسه الخوف سكنى
أصل عمري ما خوفت خالص
م الحياة والعيشة يعني
واما جيت الدنيا سارح
توهنتني ف بحر جارج
ويا حبة من الملامح
كات غريبة بجد عني
شوفت عالم طبعه قاسي
وناس غريبة يقولوا ناسي
اللي فرحان بيا خالص
واللي زعلان من وجودي
بس لولا العيب ياكلني
خوفت يومها بجد ياما
واتملت بسنين ندامة
ألف حيرة وهم صابني

نسى عمري الإبتسامة
جوه سجن الحزن سابني
أشكي حال الدنيا ولا
أبكي ع العمر اللي ولى
ولا ألوم ف زمان ملخبط
خلى كل الناس علاوله
مش بإيدى غصب عنى
إلتقيتني تهت منى
تهت منى

سینا

كل نقطة دم سالت
فوق ترابك .. بتنادينا
للجميع ندهت وقالت
إن رمز العزه سینا
مستحيل نتخلى عنها
للطغاه والجبارين
اللى مش عارف قيمتها
واللى بيها مستهين
واللى بيموت ولادها
بالخداع وبإسم دين
كل همه بس زادها
مش مهم حق مين

ناسى ربه ناسى دينه
والإله غضبان عليه
الخيانه فوق جبينه
والغباء دا طبع فيه
سينا يا أرض الحياه
والرجال الطيبين
طول ما حافظك الإله
راح يغوروا المجرمين
موسى كلم ربه فيكى
فوق جبال الطور زمان
شايفه رسالته وبعنيكى
كنت شاهده ع البيان
بس وحياتك ياغاليه
وحق كل شهيد فى حضنك
إنتى لازم تبقى عاليه

مهما حاولوا ينولوا منك

طول ما فيكي اسود رجال

راح تكونى جنة خضرا

هما دول ليكى الأمال

والعزيمه قويه حاضره

راح نعمر فيكي دايمًا

ربنا دايمًا راعينا

والآدان ساعة ما يدن

راح نقول يحميها سينا

سينا

راجع نفسك

غلطة عمرى إن أنا عدت

كل حواجزك واتمنيت

إنى أصلى فى محراب عشقك

والشياطين واخذاه البيت

صارح نفسك يوم بعيوبك

شوف بعيونك بقعة توبك

هات ضحاياك وابنيهم كعبه

طهر فيها كل ذنوبك

إجمع كل قصايدك هاتها

شوف كام واحد ساكن فيها

كل قصيده وليها حسابها

وانت لوحذك حاسس بيها

راسم نفسك فى عيون غيرك
فاكر كله وهاجر طيرك
علمتنى من كذبك ياما
روح من قلبى كتر خيرك
سايب ليه حبك ع الغارب
كام واحد من ريقك شارب
سلعه رخيصه الكل حاببها
علشان ياخذ منها النايب
بحرك شايف فيه المايه
بس دى رسمه وهو جفاف
إنت بجد صعبت عليا
لازم ربك منه تخاف
أرضك خصبه وفيها البذره
طرحت ثمره وفيها النور
فكر حبه وبص لبكره

خاف لو يوم بان المستور
عامل فيها انك مش همك
وانت الخوف بقى يجرى ف دمك
راسمه عمايلك كل أصولك
وانت تملئ السئ ظنك
كثر غباءك ضيع منك
ناس تتمنى تقرب منك
لما خداعك بقى شئ واضح
كله بسرعه إتهرب منك
راجع نفسك عيد حساباتك
صحح تانى كل ما فاتك
مهما هاتخسر . كسبان نفسك
لازم ترجع قبل مماتك
لو مش حابب ليك الخير
هنسى وأسيبك عكس السير

بس دا واجبی وبقولھوںك

طیرك ظالمه حقیقی كتیر

أصعب وقت

أصعب شئ

لما لأول مره تقابل حد تحبه

طول الليل سهران بترتب فى كلام ياما

عايز لما تشوفه تقوله

وكل ما يجرى الوقت يعدى

تزيد الدقه جوه ف قلبك

حاسس نفسك كده متلخبط

نفسك يجرى الوقت بسرعه وييجى تشوفه

بس فى شئ جواك متمكن

رغم انك منك متمكن

بس الحاله اللى انت عايشها

أول مره انها تحصلك

زى العاده ودا المعروف

حالك مش هو المؤلف
خارج قلبك كدا عن طوعك
وبيتنطط جوه ضلوعك
فيه إحساس جواك بالخوف
طير طعم النوم من عينك
حاسس ان الوقت معاندك
واقف كله مايبعديش
كل ماتيجى عنيك على ساعه
شايف انها مابتمشيش
طلع الفجر ولسه عنيك مخاصمها النوم
كل قصايد العشق قريرتها
حتى الطقم كمان برفنته
بعد غسيله لما كاويته
كل متاعب الدنيا تهون
علشان حلمى اللى اتمنيته

يكفى عيونه لما هاشوفه
ولا إيديا إن جت فى إيديه
بس ياخوفى لما هاشوفه
ما أقدر أقوله أنا حاسس إيه
بس أكيد راح يقرأ عيوني
ويفهم إيه جواهم ليه
أصعب وقت يمر ف عمرك
لما تكون مستنى حبيبك
عايز تعرف كل مشاعره
ويطلع هو كمان بيحبك
وقتها نفسك كل العالم
يسمع قلبك عمال يصرخ
لما تحس انك فى الجنه
لما يحبك حد تحبه
وتلقاتك ساكن جوه ف قلبه

فى حضرة العشاق

فى حضرة العشاق

زى حمام الحمى

طاير لفق فى السما

عمال أطوف وأرفرف

فوق كعبة العشاق

باعزف على الأوتار

بأجمل الألحان

حاسس كائى باعيش

فى زمانى دا سلطان

ضحكت لىالى الحزن

جفت دموع العين

يلعنكوا إنس وجن

يامفرقين حبيبين
فى حضرة العشاق
عامل أنا درويش
جايلك وأنا مشتاق
أنا ليكى بس باعيش
ياساكنه قصر الشوق
واقف على قصرك
فى رقبتي خنقة طوق
مكتوب عليه هجرك
بستان حياتي ورد
فتحها نور عينك
عشقك عليا فرض
والذنب لو أسيبك
أعلنت كفرى كثير
رافض ياناس الحب

أتاريتها جرح كبير
والكفر دا كان ذنب
تايب على إدينك
متوضى من طهرك
مين اللى هايدينك
غرقان أنا فـ بحرك
ياسكه فيها النور
وعيونى عشقينك
لو بينا ألف بـ حور
لازم أعدلك
لا انا عنتر ولا روميو
ولا قيس اللى كان مجنون
أوقات ما كانوا بيحبوا
من قبل أنا مفتون
انتى فـ ضلامى الضى

ياسكتى لـ جنتى
مخلوقه مالکيش زى
ومأنسه لى وحدتى
راويت وردك بشوقى
فاحت معاه محبتى
عشقك دم لعروقى
يا بطله وف قصتى
فى حضرة العشاق
عامل أنا درویش
جاينک وأنا مشتاق
أنا لیکى بس باعیش
فى حضرة العشاق

حلم فى تابوت

طال الانتظار

ليل نهار

وأنا بستنى الربيع

يرجع ويعلن

انتصاره ع الخريف !!!

وأشوف الورق

فوق الشجر

طارح خضاره

وبيثبت إنه

مش ضعيف !!!

باين إنه حلم

واتشنق جوه زنزانة الحياه

والحقيقه ما بينا تايهه

جوه زيف !!!

ما أنا عايش ف دنيتي

زى الورق ع الشجر

مستني يوم يدبل خضاره

وينتهي

ما أنا فيها ضيف !!!

خايف فى يوم

الربيع يسلم

كل مفاتيح الأمل

قبل الأوان !!!

طب والعمل

صبرت ياما

وانتظارى له حدود

من كُتر قسوة قلبهم

سهرُوا الدمعه جوه عيني

نسوني طعم الحنان !!!

كثر الألم

وتر العذاب صبح مشدود !!!

علموا قلبي الجحود !!!

ماهي أصلها أحلام

ومتكفنه

صاحبها المثل

وشكلها متلثمه

جوه ف تابوت !!!

مستغرب ليه ؟!

ليه مستغرب

لما باقرب

واما أحكيك عاللى بحسه

وانا وياك

حاول جرب

إنك مره

سيب إحساسك يفرض نفسه

هتلاقى نفسك واحد تانى

حتى الكلمه اللى هاتخفيها

هاتخرج منك زى أغانى

أصل الحب بيكسر فينا

أيُّها صمت

بيخلى الشوق جوانا مبالغ
لما بنوصف شئ بنحسه
خايف ليه من حبي الزايد
مانت عارفنى
حتى ان كنت انا مش وياك
برضه شايفنى
بس أنا قوللى أعملك إيه
كيف البدر عيوني شايفاك
لو هاكتب فيك
مليون أغنية ما هاتوفيك
إنت الحب
طارح ليا ف بستان عمرى
أحلى حياه
سبينى أحبك وأعشق فيك
طيب قلبك ويا حنانك

ولا الرقه اللى ف نظراتك
خلوا الدنيا أجمل بيك
وانك متربع جوه ف قلبى
تؤمر تنهى وأنا بسمعلك
عمرى ما أكسر يوم قوانينك
واما إيديا بتحضن إيدك
بنسى الدنيا وانسى العالم
مستكتر ليه الحب دا ليك
مستغرب ليه العشق دا فيك
مانت بس اللى اتمكنت
تدخل قلبى واستوطنت
واتملكته واتوليت
سلطان حاكم كل ما فيه
مستغرب ليه

مصر هاترجع

مصر هترجع تعلق وتكبر
واحنا بايدنا إلی هنبنيها
مهما الغدر فيها هيكثر
إحنا ولادها إلی هنحميها
لو طلبتني ف يوم ما أتأخر
لا بالعكس أنا هاجري عليها
مهما حصلي ف يوم متأثر
كل حياتي تهون وأفديها
بس شويه الحال إتعسر
ربك بكرة هيسويها
وبلاش تسأل إيه إديتني
وإسأل نفسك إيه باديهها

مصر ورده فى البستان
كله بايده لازم يرويها
ليه نفارقها فى الأحزان
وأما بتفرح نجرى عليها
إيد مع نفسها ماتسقفشى
يلا نعط إيدينا ف إديها
مهما الصعب يكون مانخافشى
بايدنا هانحفر مجدنا فيها
مصر هترجع تعالى وتكبر
وإحنا بايدنا إالى هنبنيها
مهما الغدر فيها هيكثر
إحنا ولادها إالى هنحميها

معنى الغرام

العيون ساعة ما شافت طلّتك
حلفت لتسبق خطوتي وتقول كلام
والاماني جات بسرعه وقابلتك
تتمنى تكمل قصتي بلحن الغرام
ياللي القمر من طلّتك صابه الكسوف
والدنيا شافت ضحكك مابقاش في خوف
رمانى قلبى ف سكتك تراتيل حروف
ترسم في مستقبل يعيش بالابتسام
ضللتى على روى الكنيبه ببسمتين
ومن حنان قلبك سقيتيني الحنين
والدمعه غابت عن عنيا .. من سنين
ونسيت معاكي اي جرح .. او ملام

ازاي ما حاسيتش بغرامه ليك يا قلبي
وازاي تداري وتتكرم من نبض حبي
دانا كنت باتمناك ياعمري تبقى جنبي
من وقت ما قلبي عرف معنى الغرام

أعز الناس

لما النور يهرب من عينك
فاضل إليه

لما الورده عبيرها يروح
لما الضحكه الحلوه تروح

لما ربيعنا يكون مخصصنا
وتلقى الدنيا بحالها خريف

زعلان لما قمرنا فارقنا

اللى منور كل حياتنا

بيجى الليل وبكل قساوته

يكسى نهارنا

ماتفكرش ف بكره خلاص

راح من بينا أعز الناس

خد وياه الفرحة وساب
كل الأحزان ماله قلوبنا
بتعذبنا
لو كان يعرف إن فراقه
قاسى علينا
لو كان بعده شئ بإديه
أو بإدينا
كان هيفكر ياما ف بعده
قبل ما يبعد يوم ويسيبنا
أصل فراقه صعب علينا
حتى الشمس بتعزينا
رفضت تطرح كل شعاعها
فضلت تبكى عليه وحزينه
أه لو شوفتوا نجوم الليل
واقفه قصاده

رافضة بشده يكون لها ضى

رافضة بعاده

حتى الصبح طالع ومغيم

رافض يطلع من بعديه

ولا البحر على ف موجه

رافض تمشى المركبه فيه

جف الدمع ف عين الطير

ضيع نوره جوه عنيه

أصل الكل بيبكى عليه

أعز الناس

راح من بينا يادنيا خلاص

الربيع

جانا الربيع بعد الشتا
وغنى الطير فوق الشجر
كان الصراع جامد أوى !!
بين الخريف
وزهور عناقيد الربيع
لمّ الربيع -
كل الحبايب وانتصر
الحكم إيه ؟! ..
دا مش مهم !!
إصرف نظر
سافر شتانا بلسعته
وببهدلتنا بالمطر

والشمس كات متبسمه

ودفاها ع الكل انتشر

خلى الحياه

بيضه ف إيديك متلونه

كل الأمانى -

ب العزيمه ممكنه

لمتنا دى مع بعضنا

بالحب راح نبنى الحياه

أمل م خضر أرضنا

والفرحه غطت حزننا

يابختنا

لو كل يوم نبقى كدا

بيجى الربيع ويلمنا

هادعى وأقول لربنا

خلى الربيع يطول سنه

يطرح نسايمه فـ قلبنا
ننسى خلافنا لبعضنا
خلى البساط دا أحمدي
على رنجه وملوحه وفسيح
واللحمه ملفوفه فى سبخ
واشوى الفراق
عـ الفحم حى وعذبه
يارب بارك جمعنا ماتشتته
عالم يارب نوايا قلبى ومقصده
مش قصدى أقـس الربيع وأتعـده
ولا عيد لـ مله غير الملـه باعيده
فصل الربيع بدايه لينا مبـهجه
بنودع فيها برود شتانا المؤلمـه

وش تانى

خلاص إنسى اللى فات

أنا ما بقتش أنا

أنا اللى عرفته مات

بقى حد غيرى أنا

خلاص إنسى حنانى

جرحك ليا عمانى والطيب فيا مات

هقلب على وش تانى

وحياة قسوة عنادك

أنا هخدع فيك وأغش

هعمل غلبان قصادك

وأنا لابس ألف وش

بكره تتمنى موتك

من جرحى ماتلقا هوش
تصرخ مايبانش صوتك
وتتوه بين الوشوش
مش هارحمك ياطيرى
ياللى بتنكر فى خيرى
وهياخد حقى منك قلبى مش حد غيرى
خلاص إنسى حنانى
جرحك ليا عمانى
والطيب فى مات
هقلب على وش تانى

يا كلمه تايهه

ياكلمه تايهه

جوه قاموس الحيرانين

المشتاقين

غرقانه ف بحر الهوا

مش عارفه شطك فين

لملمت حرفك

لما انحرف

عن حضن ضلى

وفضلتى ليا تهمسى

فيا تضلى

دبلتى وردى بين اديكى

راح منه عطره

لما شاف
جرح الخيانه المستهين
مع دمعين
من العينين
نازلين على خدك بلمعه مزيفه
لما إنتى ناويه تمثلى
دور الخيانه باحتراف
من غير معين
غير قلب كان كل همه
يسعد القلب الحزين
لكنه شاف فى كل مره
حاجه تأكد
من المأكد
إن اللى ليا
منك دا عمره ما كانش حب

كل شك جوه قلبى
أصبح واضلّى منك أوى
كل الورق كل السطور
اللى انكتب عليها حرف
من شوقى ليكى
بإديا لازم تتطوى
ياكلّمه تايّه
جوه قاموس الحيرانين

أنا مش ملكك

هو انتى فاكركه الحب يعنى

حاجه واحده وف خيالك

عايزه بس تملكينى

أبقى حاجه من حاجاتك

أبقى فصل فى روياتك

أبقى فى الاسكور جنابك

لسه مستنى تنادينى

يا أميرة عرش نفسك

فوقى من نومك وحلمك

لمى شعرك عن عينيكى

وفتحىها قوام شوفينى

لسه عايزه تعرفينى

بصى حبه جوه عينى
شوفى نفسك جوه منها
تلاقى نفسك ساكنه فيها
ان كنتى حاسه يعنى انك
لحظه ممكن تملكينى
هاطردك منها واسيبك
لو هتاخذى منها نورها
وتسيبيلى بس ضلمه
عادى بس ما تملكينى
عمرى ما أبقى ف أنتيكاتك
سد خانه لشئ فى ذاتك
ولأ لعبة بتلعبها
جايه بيها تسلى وقتك
إحسبيني من النهارده
ماضى عدى ف ذكرياتك

لسه فيكى هاعزى نفسى
لأن حبك فيا مات
واوعى مره تقولى إنك
عاشقه ليا وحييتينى
صعب أصلا تملكينى
انتى عايشه ليكى وحدك
فاكره إنى هابقى ملكك
روحى عيشى جوه وهمك
واشطبينى من حياتك
واوعى حتى لحظه إنك
بين منامك تحلمينى
صعب تعيشى لحظه حلوه
لو معايا جوه حلمك

مالیش فی الورد

نزلت بستان الورد
ملاقیتش فیہ وردہ
أتارینی فی الخریف
وشوفت بعید وردہ
طالعہ ما بین الشوک
و لوحدها شاردہ
لاقیتنی مشدود لها
ما انا یا ناس عطشان
واللی عطشه شدید
حتی ان شرب خمرة
وما فیش معاه مایہ
هایبقی شربه مباح

ودي ورده فى البستان
وطالعه زرع شيطانى
تغوي العيون بجمالها
حقيقه كات عجبانى
لاقيتها وأنا سواح
فى سجن أصله براح
ملعون أبوكى يا حيره
بين الأمل واليأس
عصفورى بين ايدى
إستحمل عذابى كتير
عطشته م الحنيه
منعته انه يطير
لسه باقى عليا
وم الهوى بيغير
حبسته جوه عشى

قال كفايا عليا
أكون معاك محبوس
ولا أتسجن فى براح
وخاديتنى تانى الورد
العين خلاص عشقوها
وعرفت إن الورد
غيرى كثير شموها
الورد دى أصلها
لو كثير لمسوها
بيروح أوام عطرها
وأخرتها يرموها
أصل الألوان فى الأصل
ماكانش أوانها
واللى يغره الشكل
يتوه فى احضانها

عديت ياناس ع الشوك

عشان اعديلها

ماحستش كتر الشوك

جمالها كان ساحر

عطرها فواح

واخذنى ع الآخر

ولما روحتلها

لاقيتها دبلانه

راح ياناس عطرها

ووحيده غرقانه

فى مايه متلوته

م اللى لمسوها

لوثنى ليه بستانك

أزمتى البشر منك

لو الجنينى صانك

كان فاح العطر منك
أصل الهوى قادر
طوحها ع الجنبين
أتاريه لعيب وفاجر
خلاها تغوى العين
رجعت وسط الشوك
آلمنى كتر الوجع
ياريت ماعديتها
ولا غر عيني الدلع
ماعرفش كان دا عطش
ولا غلبنى الطمع
مسكين ماليش فى الورد
ماعرفش أنواعه
رجعت تانى لطيرى
طيبت أوجاعه

ومركبه فى بحرى
صلحتله شراعه
سقيته كاس هجرى
صان قلبى ما باعه
أتارى ف عشى ورده
محتاجه أرويهها
راويت لغيرى ورده
وتملى ناسيهها
أسف ياوردى بجد
خادنى الهوى بخداعه
مسكين ماليش فى الورد
ماعرفش أنواعه

ساكنه بيتنا

جوه بيتى ف كل حته

ساكنه بيتنا

أمى فيها يا خلق ساكنه

إنتوا فاكرين إنى فاهم ..

زى ما إنتوا مش فاهمين

إن أمى يعنى ماتت ؟؟

عايز أعر ف بس ليه

ليه قولولى مصممين

ترددوا .. إن أمى راحت .. ماتقولوش

أصل عيشت معاها عمر ..

إنتوا زايى ما عيشت هوش

ع الحيطان شايف صورتها

ف كل ركن شامم ريحتها
حتى وأنا جوه ف أوضتها
شاي ف شكلها ف نومتها
عيني شاي ف عينكوا لا
حاسس لسه حناها أيوه
يعنى ممكن أنسى؟! . لا
لما كات تبكى لبكاي
لما كات تفرح لفرحى
أما أكون بردان وتيجى
بحضنها كات تدفى بردى فى
وأما كتير خافت عليا
وأما كات تسهر وأنام
لما كات تحس ألمى..
وأما تنزل دمعها منها تبل خدى
وأصحى أقول يا اما مالك

ليه عنكى مدمعين
وتقولولى أمى راحت ؟
واللى يحس بيا مين
كنت هاعرف أكيد ساعتها..
لو روحى كانت منى تاهت
ازاى تقولوا مش هاترجع
مهما تقولوا مش راح أسمع
طاب مين قولولى مره يمسخ دمعتى
أو غيرها مين هايأسنى ف وحدتى
قولولى يمكن تغيب يومين
أصل إنتوا بيا مش حاسين..
مش فاهمين يعنى إيه النور يفارق العينين
وهالقى غيرها الطيبه فين
طاب اشترولى طاب حنان
أو هاتولى معاكوا حبه م الأمان

يعنى هل ممكن تلاقوا ؟؟
إرحموني أبوس إيديكوا
إبعدوا شويه وسيبوني
عايز أبقى شويه وحدى
هى أكيد دلوقتى جايه
مش هاسيبها تمشى تانى
وهاسمعها بتدعى ليا ..
تقول حياتها تهون عشانى
هادخل انام أنا ف أوضتها
وأما تيجى هاتصحينى
عشان أروح أنام فى أوضتى
وبإيديها هاتغطينى
وتدينى أحلى بوسه ع الجبين
ما إحنا كده متعودين
كل يوم أخذ منوم

بوسه منها أو بوستين يالا روحوا
وابقوا سيبوا الباب موارب
أصل أمى وهى خارجة
نسيت كل حاجة ليها
ونومى عليا بيبقى غالب
مش هاسمع خطبة إيديها
أمى مش عارفينها يعنى
لما كات تدخل علينا
وإحنا نايمين بتصحينا
كانت تخطب خطبتين
وبعدا تدخل علينا
بكل حنيه تناديننا
كنا نزعجها ف منامها
وهى كات تخاف علينا
ماحدش يزعل فيكوا منى

ما أنا اللى فيكوا طالع لها
وكأنى الوحيد من بطنها
نفس ضحكنا البريئه
نفس كلمتنا الرقيقه حتى شكلى شكلها
وكلكوا بعدتوا عنها
وانا اللى منكوا فاضلها
كنا نبكى ف حزن بعض
كنا نضحك زى بعض
كانت تمسح دمعى ليا
وانا كنت بمسح دمعها
داخل أنام على فرشها
وان طالت نومتى ماتقلقوش
وان غيبت عليكوا ماتخافوش
أصل لو ماجاتش هى
يبقى لازم أروحها

حكايات جدى

كان يا ما كان

أيام زمان

لما بقعد وأسمع جدى

وبيحكلنا فى الحكايات

حكايات ياما كات وهميه

كانت فيها فكره وعبره

وف لمتنا ع الطبلية

كنت أنا بقعد أطأطأ ودنى

وأشوف الشاطر دا فى الآخر

إيه راح يعمل ويا البطله

لكن الليله غير جدى

مجرى حوار له حاجه عجيبه

ولا خبيش يا إخوانا عليكموا
لف دماغى وتهت أنا حبه
كان فى الأول بيقول شابه
حلوه جميله الكل رايدها
وعشان حلوه وكلها خفه
الكل لحالها ماكانش سايبها
قولت ياجدى إشتاقت أنا ليها
من حكاويك الحلوه عليها
قاللى حبيبى كبيره عليك
لكن حاسه دايمًا بيك
حاسه بكل اللى بيعشقها
وبتتكلم ولا تسمعها
شابت يابنى من أوجاعها
عمرها أبدا مايتتغير
بس ولادها مش حاسينها

تايها عقولهم مش فاهمينها
وكتير يابنى تنادى عليهم
عايزه تاخدهم بين أحضانها
ومهما ياولدى نزيد في الامها
ساكته وراضيه ومابتنطقش
ورغم دا كله وبرضه قويه
مابتتهزش ولا بتمل
وطارحه الحب كمان ع الكل
ع اللى رايدها واللى سايبها
واللى حاببها علشان خيرها
واللى بيدى علشان امه
ولا ينفعش يفوتها ف مره
أصل العيشه ياواد من غيرها
تروح حلاوتها وتكون مره
قولتله فين الاقيها يا جدي

قاللى فى كل مكان تلاقيها
دَوَّر جواك راح تلاقيها
جوه عيون الشمس وضلك ..
فرحك املك
حتى ف حلمك راح تلاقيها
و مش هاتشوفها حقيقى بجد
غير لما تبطل تاخذ منها
وتعود نفسك كيف تديها
مش تديها حاجه من جيبك
مش محتاجه تاخذ منك
عندها يابنى اللى يكفيها
لكن عايزه تحس بانك
واقف للى عايز ياديها
عايزه ولادها يكونوا حواليتها
لكن الكل عايز يورثها ..

ويقسمها ويبيع فيها
والتربيه راحت ع الفاضى
وأبص عليها ياواد وأستعجب
وأضرب كف كمان على كف
برغم القسوه من أولادها
وتقول برضه أنا مش هاقسى
وأقسى إزاي دول أولادى
طول الوقت عليکوا تنادى
فينکوا حبايبي تعالوا ف حضنى
وبلاش حد منکوا يسيبنى
ويبعد عنى وأكون مشغوله
خايفه تاخذکم منى الغوله
تاکلکم واحد ويا التانى
وأفضل أبكى عليکوا وأعانى
من فرقتکم عن بعضيکم

وعشان كده خايفه عليكم
لا حد بيسمع ولا بيرد
والكل فى ودنه كمان بيسد
باصص بس فىن مصلحته
حتى ياواد لو قل ف قيمته
وناسى الأم اللى كتير تعبت
علشان تحفظله ف كرامته
واللى بياخد ولا بيهمه
بيمد ويسرق من جيب أمه
لا يعرف خشى ولا يعرف عيب
ويزعل لو تحجبه وتلمه
بقى معقوله دول أولاد
رغم إنها ياواد بكريه
زى بكارة العذراء ..
إلا ان ولادها كتير

وفيهم اللى ماشى بجهله
يعادى فيها ولا بيهمه
لكن هى بطيبة قلب
تحن عليه وتقرب منه
وعمرها مره مابعدت عنه
الكل شايفها حبيبي عروسه
لفت يعنى ياواد وإحلت
وم العين دايمه محروسه
وبيعشقها حى وميت
أصل الموت مش رمش ورمش
وبيتقابلوا يطفور النور
دا الاحساس زى الأنفاس
بيهدا ويرجع تانى يثور
أصل البطلة ياواد الليله
ليها بدل الشاطر ألف

أو ييجى حتى 100 مليون
والكل عاشقها كمان بجنون
وتوته توته ودى الحكايه
أميره وليها كتير شطار
ساكنه ف قصر كبير وعالى
وحراسها ياماع الأسوار

توبك داب

ما بتحسيش ودا طبعك

ومين قالك

وخذك إن أنا إنك

أكيد القصد دا دُلك

ومين دلك

و قال الحسن من وصفك

وأنافكك ليه

مانا عارفك

ما يمكن كله مش شايفك

كما شوفى

ماهو انتي الكل بيجاملك

فمن خوفى . لاتتغرى

رميت الخوف ورا ضهرى
بلاش تحتارى وتقولى ماحبتكيش
حررت قيودى من بُعدك
مع انى
وانا وحدى ومن غيرك
ثوانى الفرح ماتزورنیش
فامتظنيش
ظن الكره من يمی
دا كان حلمى أعیش ليكى
وجنة عمرى فى عنيكى
وشايل قلبى بين كفى
ومتصفى
ولا غيرك عایش فيا
وهاعمل إيه
حاولت كتير وماينستش

أغير طبعك القاسى
ومش ناسى
دموعى ف عینى لُتحنى
وقلبك سابنى ولا حاسش
ونار جوایا کویانى
وقلبك أعمى مایشوفشى
رجعالى تانى عایزانى
دا توبك داب ماینفعشى
و توب العشره مایدوبشى
هافكر لیه أنا تانى
واعیش أوجاعى من تانى
ماكان بادیكى تختارى
و كنت معاكى أنا شارى
ماقدرتیش
خسرتینى ..

بكام قصه ..

بكذبك عنى تحكيها

شبعتك منى بزياده

و دى العاده

بقيتى مينا للمرسى

رَسَّيتى كتير على شطوطك

فاشطك صار صعب ليا

فانسى إنى هاكون ليكى

لأنى ناسيكي من يومها

ونسيانك صبح غيه

أغنية المَعْلَمَة مش بسهولة

المعلمه مش بسهولة
دا جدعنه يابا ورجوله
كسبنا حب الناس لينا
عشان سكتنا معدوله
خاليتنى انا علمت عليك
أصلك باصص على رجلك
كل الناس حواليك شايفه
وبرغم شوفك عاميه عنيك
ماديتلك ايدى نتصاحب
وياك انا قومت بالواجب

اتاريك معايا ومع غيرى
مالكش يابنى فى الواجب
زرعت زرعك وراويته
قلعت زرعى أنا وراميته
لحم كتافك من خيرى
ازاى دا كله إنت نسيته
طبعك غريب وملكش حبيب
ولا تعرفش معنى العيب
هاروح وأسيبك للدنيا
هاتعلمك هى التأديب
مابقاش ليك جوايا مكان
أصلك يابنى مالكش امان
صونت قلبك وراعيته
بقسوه قلبك راح وخان
من دلوقت انسى اللى فات

مالکش عندی انا ذکریات

مش هاجن علیک تانی

مـ النهارده انا قلبی مات

أغنية

توب الغلابه

جاين ع الشقيانين .. لابسين توب الغلابه

ناس زى التعابين .. واحنا ياعين طيابا

الحقد ليه عماهم .. وهاجر ليه ضميرهم

بالخير كنا معاهم .. ولا شوفنا مره خيرهم

هابيع اللى إشتريته .. وادوس ع الطيبين

وأهد اللى بانيته .. وأكسرله أى عين

عالم مالهومش ديه .. فى الطبع مفتريه

وأنا لو مشيت معاهم .. أنا هاجى ع اللى ليا

يا عم الدنيا لينا .. ورقه فى إمتحان

ياتعدى بخير علينا .. يا إما فيها نتهان

ويادنيا ع العموم .. أنا شارى فى اللى منى

دا القوه مش بتدوم .. وفيه اللى أقوى منى

أغنية

عيال هفيه

الوحش لو يوم يوقع .. عليه تعوى الكلاب
وأخويه راجل جدع .. حاضر لو حتى غاب
اللى عاش فى خيريه .. ماقالش كتر خيريه
وبسرعه مات ضميره .. ف ضهره راح وعاب
صلبت أنا ضهرى بيه .. وصيته ماشى عليه
وأهو جار زمانه بيه .. وف صغر سنه شاب
ماعرفش مالك بيه .. ماتخفى يادنيا عليه
ما اداكى ياما اديه .. ظالمه ليه فى الحساب
بلاش يكون ضحيه .. عشان عيال هفيه
والله لو بإديا .. لاسقيهم العذاب
مسيره يوم هايرجع .. يديكوا درس يوجع
واللى عليه اتدلع .. هايسف يومها تراب

الحياه جوه ميت

من غير ميعاد
بنلاقى حاجه تشدنا لضحكه زمان
نفس المكان
فيه حبه يعنى اتغيروا
بس فاكراه كانه لسه
اللى ببسرق عمرنا وضحك الولاد
لفيت بلاد .. ولقتنى تانى ع الطريق
محتاج صديق
ياخد بايدي يدلنى
على فرحه غايبه من سنين
ياااه م الحنين
لكل حاجه عيشنا ليها

وكنّا فيها صغيرين
الغريبه العمر رايح
واحنا فاكرين انه جى
كل شئ فينا ميت . بس حى
كنّا نفرح لما حاجه فينا تكبر
والسنين كل اما تكثر ..
الرصيد عمال يقل
والغريبه انى شاعر
واللسان عاجز يعبر
وانا اللى فيا بحور مشاعر
تكفى كل العاشقين
وشطوط حنين . رغم الانين
ياااه مـ السنين
توهتنا جوه بيتنا
غيرت فينا الملامح

والحياه محطات ورحله
كل شئ جواها رايح
كنت بافشل أيوه وأنجح
واما باقعد ويا نفسى
الخيال ياخدنى وأسرح
جوه بحر من الحنين لايام زمان
أجمل سنين
لما كانت البراءه هى عنوان الكلام
لما كان الصدق صاحب
لما كنت ازعل واعاتب
لما عاش الغش بينا سنين فى وحده
لما كات ايدينا واحده
كنا نقسم بينا لقمه
حتى لبسى النهارده لابسـه
بكره صاحـبى يبقـى لابسـه

حتى كان الناس ما بينا
تتوه ماتعرف مين شاريه
واما افوق من رحله كانت
جوه بحر الذكريات
ألقي نفسي جوه موجه م الأهات
عمال بادوار ع الحياه
جوه ميت عمره فات

ملك الغابه

احنا بجد حقيقى غلابه
عايشين ويّا قلوب نصابة
صعبة الرحلة شوية ولكن
عُمة وبكرة هنفرح يا ابة
اسمع وافهم فين العلة
نفس الشلة واحنا طيابة
وادي بلدنا الحرة مصاحبة
عالم جاحدة بقلب ديابة
زي فريسة ف ايدهم سهلة
اه لو يفهم ملك الغابة
ازاي يملا وشوش بالفرحة
سارحة ف بحر هموم وكآبة

ما يقويش الشلة اياها
وان قواها دي تبقى خيابة
اصل هدفهم كان الذلة
صوتهم علة والنبي يا ابة
طيب بايديك جرحه ولمّه
اصل بلدنا بجد مصابة
محتاجة مننا وقفة بهمة
مش محتاجة وشوش قلابة
وقلوب خاينة قليلة الذمة
سارحة ف كل ميدان بربابة
بس بايدنا بلدنا هترجع
نهر محبة وخير وطياية
اسمع واعرف وافهم يا ابة
ان حقوقنا مش متسابه

الراعى ف خمسہ باب

(1)

الفجر ليه طالع حزين
والليل بيتحدى النهار
والصبح حاسس بانكسار
والشمس عينها مدمعين
خايفه من كسر النهار
ليه الأمل بقى عنا غايب
مش عايزنا نكون حبايب
والربيع رافض يخضر أرضنا
والبدر بيوشوش بشوقه للنجوم
قال مين؟؟ ومين؟؟
! عاوز يفرق شملنا؟

(2)

السمك ما عا دش يضحك
لما موج البحر خالف كل وعده
وقال ها ينشف
خاف السمك إنه يموت
لو الشطوط فتحت ببيانها
للميه تخرج
هيبقى كله زى بعضه
البساريه تبقى حوت
صابها حاله م الدهول
وكله ملتزم السكوت
حتى بصوا لبعض قالوا !
مين همه يخلص مننا ؟؟

(3)

الكل سهران مش جايله نوم

لما إختفى الحلم ف منامهم

مش لاقين دوا لالامهم

عجزوا الأطبا يداووا فيهم

ومش لاقين رد لكلامهم

صدروا لغيرنا الدوا

وجابولنا منهم سمهم

ياظلمهم

فى عروقنا خلوا الدم ميه

وسابوا بس دمهم

حجروا حتى ع الهوا

وخلونا ناكل بعضنا

(4)

الراعى آمن للذئاب

وياخوفى ع الغنم

مـ الديب

بكره ياكله الديب

ويحلى بعده بالغنم

الغدر طبع الديابه

والغنم عندك غلابه

يا أبو الكآبه

بلاش يفرق الديب ما بينكم

ويضعف غنيمته

بلاش تمحى فـ أسودك

وعشان تضمن سلامتك

إقطع رقابته

دا لسه وراه شلة دياه

بلاش تخلصى الضحيه سهله

دى ديايه واعره

بس لو ناوى تبيعنا

والخريف يكسى ربيعنا

وتضحى بينا

خلصى دبحك قبل سلخ جلدنا

(5)

قاموا العزا والفرح حدانا

واحنا حزنا لعزاهم

مفروض علينا فرحهم

حتى واحنا حزانا

عايزينا نكون بلياتشوا ليهم

نسعد حياتهم

وكل هدفهم جفانا
بيطردونا من بيت أبونا
ماحدث ينطق بكلمه
خدوا من عينينا نورها
وسابوا لينا بس ضلمه
ملعون أبوهم كلهم
اللى عايزينا نعرهم
وهما عاشقين ذلنا

نبأ عاجل

جنه خضرا

فيها تلقى الخير دا يفرح

فيها بيكافح ويدى

يزرع الحلم يحصد

خير طارح وف عينيه

بكره جاى كله حب

عائش حلمه جوه منها

فيها شب

فلاح راضى

شقيان عادى

هى دى بالنسبه ليه

أحلى عيشه

مايه ماشيه تروى أرضه

يتعب يعرق

يحرم نفسه انه ياكل

أو حتى يشرب

بس أرضه لابد تشرب

وللا لما يسمع راديو

والست فيه

سلطنه

والجوزه ف إيديه

والشأى لما يـ كون

فوق النار اللى بـ حطب

عارف أخبار كل حاجه

يعرف حتى الساعه كام

من غير ساعه

يحسب ليك أـتـخـن حسبـه

من غير حاسبه
رب العزه مديه صحه
وبيتحمل
نادر جدا لما ي فكر
ويروح يكشف يوم فم صحه
فى عز الحر
تلقاه واقف شغال فى الأرض
بيأدى السنه
قبل الفرض
وبيعشق صوت الشيخ رفعت
وقت مايدن
وان حد إتكلّم يزعل جدا
وقت الجمع
أول واحد
يدخل هو جوه المسجد

لولا الإخلاص اللى فدمه
ناحية أرضه
ماكانتش الأرض وقفت جنبه
كانت بارت
واحنا الحق
ناسيين فضله
وبرغم إنه
أكثر واحد أخلص شغله
أهدرنه فحقه
مليون شكر
يا أعظم راجل
ومسيرك تسمع عنك كلمه
وانت قاعد ويا الراديو
تشكر فضلك
فى نبأ عاجل

ست الكل

عارفه يا أمى ياست الكل
لما با اكون وياكى با احس
إنك جنبه لوحدى وبس
وانك ضى منور ليلى
وانك دوا لجراحى وألمى
وانك نبع حنان يسقيني
ما انتى النن ف حبة عيني
سندى ودايما بتقوينى
وف صلواتك مش ناسيانى
فيها تملى انتى بتدعيلى
عارف دايما مشغول عنك
وانتى تملى مشغوله بيا

لو قصرت أنا مره فـ حَقِّكَ
غصب عني ومش بإيديه
أصل عشان أوصل للجَنه
لازم ترضى يا أمى عليا
مهما تحسى بجفا من قلبى
يروينى قلبك بالحنيه
أمى حبيبتي ياست الكل
بستان مليان ورد وفل
شجره تضلل وقت الحر
حُضن يدفى فـ عز الطل
وبتروينى وانا عطشان
جنبك بلقى الدنيا أمان
ربى يخليكى ليا يا أمى
يا أحلى هديه من الرحمن
شايقه ملامحك دايمًا فيا

كل التفاصيل فيكى حبيبتي
تعرفى إيدك لما با ابوسها
با القى ف بوسها تملى انا هيبتى
لما تعصبى منى شويه
با امشى واسيبك حبه لوحداك
وأرجع تانى بعد شويه
با القاكى قاعده ومستنيه
وتضمينى حبيبتي ف حضنك
مش عايزانى أكون زعلان
دا انتى يا أمى كل حياتى
لو ها اكتب كل قصايدى انا فيكى
مايكفيكى ألف ديوان
عارفه يا أمى لما با اشوفك
والمح طبيبتك جوه عيونك
بالقى الدنيا بحالها بخير

عارفه ان داعب الهوا لو توبك
او شفت الحزن جوه عيونك
با ازعل اوى وعليكى با اغير
أصلك أمى وبنتى وزوجتى
أصلك أبويه وأخويه وأختى
أصلك صاحبى وكل العيله
أصلك لمة علم جميله
أصلك شهر صيام فى إيمانه
أصلك عيد مليون بالفرحه
أصلك شجرة ف بيتها وطارحه
على أولادها وزوجها الحب
مانتش جزء ف قلبى يا أمى
دا انتى يا أمى كل القلب

إحنا إخوان

(1)

فاكره حبيبتي

لما قابلتك أول مره

كان على أول درجة سلم

جوه ف قصر الحلم الأتى

لما وقفنا نبص لبعض

لما فرحت ولما فرحتى

كان فيه شئ متحكم فينا

وعنينا بس اللى بتتكلم

كنّا ساعتها لسه صغار

وابتدينا ف قصة جميله

لسه جذورها ممدده فينا

كنا بنمشى الايد فى الايد
مش خايفين من عين الناس
كان جوانا الحب بيكبر
واحنا عليه واقفين حراس
وأما يقولوا ان احنا اخوات
كنا نبص لبعض ونضحك
أصل ماحدث جه عزانا
ولا يعرفش اننا جوانا
أخ وأخته دا كلام مات

(2)

فاكره حبيبتي
لما نجحت ولما نجحتى
من فرحتنا جريتى فـ حضى
كنا أوائل على دفعتنا

بس كسوفنا أوام ساكتنا
خوفنا يلاحظوا الحب علينا
روحنا بعيد عنهم وبعدنا
نرسم فى طريقنا ومشوارنا
لما هاندخل سوا اعدادى
شوفنا الحلم بيكبر فينا
وقتها مسكت إيدى ف إيدك سوا وجرينا
واحنا قلوبنا جوه ضلوعنا
بترقص بينا
شوفنا البسمه ف عين الكل فرحان لينا
كان الكل شايفنا عيال
كان يعجبنا شوفهم لينا
علشان نفضل مع بعضينا
طول ما عندهم شايفه وحاسه
إننا لسه صغار وإخوات

(3)

فاكره حبيبتى

لما دخلنا سوا إعدادى

وعدت أولى وتانيه وتالته

وكنتى تملئ قاعده قصادى

وما فيش مره بنغلط غلطه

فى امتحاناتنا ورسم طريقنا

وكنتى الأولى على دفعتنا

وانا وياكى كنت التانى

فاكره يوميهها الوعد ما بينا

مانخلىش حاجه تعطلنا

ونرسم أحلامنا لنفسينا

فاكره زعلنا لما عرفنا

إن ف ثانوى عاملين عزله

فصول لبنين وفصول لبنات

عشش فينا الحزن ساعتها
حاييره الدامعه جوه عينا
كأنه حد فارقنا ومات
كنا نصدق إن الحصه
تعدى ونجرى أوام وبسرعه
نشوف بعضينا جوه الطرقه
كنا بنحلم نبقى دكاتره
وزى العاده طلعا اوائل
شوفنا الكل سعيد فرحان
واما شافونا وايدى ف ايدك
قالوا ما شالله عليكموا عرسان
يومها كسوفنا بان فى عينا
بس ساعتها احنا اتمنينا
نقول للكل اننا عشاق
كتمنا ف شوقنا واستحملنا

علشان فيه لسه ف مشوارنا
نكمل فى طريقنا للجامعه
ودا كان عايز مّا ثبات
ويشوفوا اننا لسانا اخوات

(4)

فاكره حبيبتي
أول يوم ما دخلنا الجامعه
كانت إيدك حاضنه إديا
ومرايتك كات فى عنيا
كنتى تشوفى جمالك فيها
فاكره كلامك لما ضحكنا
وقولتلى عارفه انا عينك زايغه
واوعى اشوفها تبص لواحد
فاكره لما دخلنا السكشن

ولاقيتى واحده قعدت جنبى
يومها الغيره أكلت فيكى
وجيتى قعدتى انتى ف وسطينا
أصل ساعتها حبيبتي عنيكى
كانت باينه أوى وكشفاكى
حتى البنّت دى بصت ضحكت
وشاورت أنا ع الناحيه التانيه
إتلفتى لقيتى مكانك
فجأه اتاخذ وملاته واحده
يومها زعلتى واتنرفزتى
واتمنيتى ساعتها تكونى
بدل الواحده مليون واحده
علشان تبقى محاطه عليا
ومافيش واحده تقرب منى
يومها فرحت وضحكت عينى

مد اللى انا شايفه فى حبك ليا
بس حبيبتي أنا برضه بحبك
ساكنه فى قلبى وماليا عنيا
مهما قابلنى بنات فى الجامعه
أكبر منهم حبك ليا
مرت ياما سنين وأهى عدت
واحنا إدينا فى إدين بعض
وإخرجنا وقتل أخطبها
بصت أمها لعيون أمى
وساكت كله ومافیش رد
حسيت إن الدنيا البيضه
والمليانه بفرحة عمرى
جوه فى عيني أهى بتسود
وجوه عنيهم باينه حاجات
فيها الدمعه ببحر أهات

وسمعت ساعتها أنا أسوأ رد
مش عارف وقتها مين اتكلم
قال اننا راضعين على بعض
وف حكم الشرع إحنا إخوان

دويتو (حالة عشق)

الشاعر / ياسر عيد (شاعر الريف)

الشاعرة / إيمان صابر (قيثاره الأمل)

1 - إيمان صابر

رجوع الروح لجسماتها

بیشبه قُربى يوم مَنّك

انا معرفتش اتحمل تكون فيا

ولا اوصلك

سجنت البوح فى شريانى

وانا ودينى بحبك حب اجبارى

ودا العادى

مافيش لو كلمة هتقولك

مفیش إحساس هیوصلک
خلاص منی
هتسانی وهتسیینی
هت عشق حد غیرى کمان
هیبقى ما بینکوا احلى وصال
بتفسیری هتبقى الخطوة لیک فدان
مفیش مخلوقه توصلک
متشبهلکش فی الأفکار

2 - یاسر عید

وأسییک لیه
ما أنا برضه کمان زایک
بحب الخطوه لو منك
تقربنی ولو ثانیه
دا انا روحی فی تکوینک

وكل ما فيا عاشقينك

بالف الدنيا وأرجعك

ما انا منك

ودا لأنك

أميرة ومالكه إحساسى

يانبراسى وتاج راسى

يا إلهامى

يانبض بيحى أيامى

1 - إيمان صابر

باحضنك حتى فى كلامى وسلامى

وان يوم تفكر تخصمنى

بلقا روحى طايره ليك

بلقى شوقى بيناديك

بشتهى كلمة بحبك

لو تقولها بشتريك
عمرى كله يبقى ليك
روحى لما تغيب بتفضل
فاكرة صوتك
والكلام اللى ما بينا

2 - ياسر عيد

حبيبتي ياليلي ونهارى
ياجنه باعيش فى أحضانها
شفافيك ديا أوتارى
كلامك عزف ألحانها
ياغنوة عشق موزونه
ووزن الشعر غار منها
ياتأشيرتى لسفر فيكى
فد سما روحك

وبحر عنكى
دا كل مافيكى يشبهلى
وعطش حسى يندهلى
أروح ليكى فاتروينى
بماية ريقك الدافيه
عسل صافى
ف حبينى كمان أكثر
دا حبك ليا يكفينى
لو ابعد لحظه عن حضنك
يكون هو مدفينى

1 - إيمان صابر

حبيبى وصولى ليك رحلة
وحلمى إنى أكملها

وأوصلك وأكون جنبك
شريكة عمرك الباقي
بناجي الطيف
في لوحة عندي مرسومة
وفيها عنيك
واكلمها وانادي عليك
فتسمحلي أحن إليك
حبيبي بوحى لك فكرة بوصلها
بشوق وحنين
واسيب أشواقى تسبقنى
تروح تناديك

2 - ياسر عيد

يانسمة شوق معاها باطير
في جنة ليا انا لوحدى

ماليش فيها أى حدود
دا عشقك والله ما بيدى
يا إلهامى فى أشعارى
رسمتك صورته بين حرفى
بتشبعنى

وان تهت يوم انا عنك
شوقى بيكى يجمعنى
ما انا وانتى روح واحده
بيجمعنا

جسد واحد على نصين
دا انا لما يزيد قلقي
بتهدينى بحضن حنين
ما انا روحى رايحالك
وفين تلقى يوم غيرك
ما فيش منك حبيبتي اتنين

1 - إيمان صابر

حبيبي بروحي راياحالك
بجمع نبضى فى ويريدى
كأنك ليا يوم عيدى
بسيب القلب يشتاقك
وباسمع بس صوت نبضك
ولحظة م اشتهى التأويل
ببقى كلمه ليك منى
صحيح الشوق كلام موصول
صحيح الحب كان ومازال
قصيدة بتكتب عنك

2 - ياسر عيد

رسمت حروفي من ريقك

حبر معطر الكلمات
يابستان ورد فاح عطره
على الورقه فى سطورى
وفلترها من الهنات
دا عشقى ليكى بالفطره
مافيش تزويق
باعيش فيكى الأمل بكره
ياسجنانى فـ فضا روحك
وسجان على قلبك
ياحضن براح
بيبعد عنى أيها ضيق

1 - إيمان صابر

كيان واحد أنا وانت وبيننا كثير
بنشبه بعض فى التفكير

فـ لـيـه الشـوق يـعـيش خـواف
وإيـه المـسموح فـي لـحـظـة شـوق
سـوى إنـك بـكـلمـه تـبـوح
هـاعـيش ازاي أنا بـدونـك
وآفـوت قـلبـك و تـفـكـيرـك
غـرامـك لـيـا كـان و مـزـال
أـمل و بـاعـيش أنا أـحـلم بـيـه
فـ قـرب لـيـا و انـدـهـلـي
بـكـلمـه تـضـمـنـي لـيـك

2 - ياسر عيد

أنا جنبك
ورمشي ضله فوق منك
مقدرش أستغنى يوم عنك

دا انا راسم طريقى الجاى .. يكون بيكى

وشايف حلمى فى عنيكى

يا فجر لعمر تانى جديد

دا انا باتوضى من طهرىك

وأصليكى لعمر مديد

وأنا معاكى

نعيش الحلم نتمنى

دا بين أحضانك الجنة

محتوى الكتاب

م	المحتوى	صفحة
1	بطاقة الكتاب	2
2	شكر وتقدير	3
3	الإهداء	4
4	رخصة غدر	5
5	حاسك وانتى حساني	7
6	ضم إيدك ويا إيدي	11
7	الكلام على مين؟	14
8	زعلانه ليه ؟	17
9	تهت مني	20
10	سينا	23
11	راجع نفسك	26

30	أصعب وقت	12
33	في حضرة العشاق	13
37	حلم في تابوت	14
40	مستغرب ليه ؟	15
43	مصر هاترجع	16
45	معنى الغرام	17
47	أعز الناس	18
50	الربيع	19
53	وش ثاني	20
55	ياكلمة تايهه	21
58	انا مش ملكك	22
61	ماليش في الورد	23
67	ساكنه بيتنا	24
73	حكايات جدي	25

81	توبك داب	26
85	أغنية المعلمه مش بسهولة	27
88	أغنية توب الغلابة	28
89	أغنية عيال هفيه	29
90	الحياه جوا ميت	30
94	ملك الغابة	31
96	الراعي في خمسة باب	32
102	نبأ عاجل	33
106	ست الكل	34
110	إحنا اخوات	35
119	دويتو حالة عشق	36
130	محتوى الكتاب	37